



嵇庵詩集卷四

江都 梅植之

重寓海陵時氏題壁

重展西窗榻低回那自禁跡殊鴻雪變思與歲華深遠
柝傳寒堞疎星出迥林十年搖落感燈影對沈吟
客舍寒城下喧卑獨避塵林低微礙屋烏聚遠防人海
色連空接秋風過眼新扁舟厭來往此地幾逡巡
曉起真無謂雞聲促夢空霜寒半溪水月落五更風破
的矜何懦吹竽笑未工不堪傷老大猶復逞雕蟲
暗牖開虛壁蕭蕭竹數竿影深秋雨碧聲曳野風寒物



色都無改吾生獨自難薄游偏久滯歸思夜漫漫

早春同古農孟瞻楚楨句生季子湖上

曉堞開雲遠春船引岸長魚跳新漲暖梅坼早風香蕭
散琴樽興流連蕙草芳看君咸瓠落端合在滄浪

寄問樵上人

并書

問公禪兄坐下自拜別後日月不居又三年矣
梵行清修深入奧蹟每一念至彌令神馳塵障
重蒙不獲趨侍惆悵何如昔在山中真成夢境
時夜將半臥聞寒泉清琴罷彈月下西嶺僕與
賓叔如游諸天幽曠宜人踟躕忘返公乃挂錫

啟社山幽非有慧業孰能棲此邇者琴學更造
幽微山虛水深神與古會不審何時一洗俗耳
春滿禪扃江郊草綠相思百里倦焉情深聊製
短篇用申清供

身世空塵海蕭寥見道心無端入幽谷有覺寄鳴琴野
水通泉溜春松覆殿陰欲浮江上棹蓮社許重尋

和句生詠草草館

野館津亭側勞人自去留風塵淹別夢車馬駐離愁杳
杳浮雲遠悠悠逝水流門前舊楊柳攀折幾春秋

酬星台

并書

辱惠手書循讀靡已辭理溫穆鏘振球鍠雖古
作者豈復踰此第虛獎誠深不克負荷惟賢者
垢疵耳僕近所處大率類君窮巷閉門幽憂終
歲聰明錮於童蒙才智窘於衣食而足下譽僕
逾涯謂所造過之殊深君子勸善之美不顧儼
人不倫之譏厚誼深情曷勝慚悚前讀大著愛
不忍釋詩筆清壯文義堅深思竭鄙才道揚萬
一恐金鐘太鏞不勞於寸筵滄溟渤澥無待乎
尺竿足下果不夷棄終必報命往者論文僕誠
狂惑至今思之猶負罪戾苟非通識能無責讓

貢詩一篇敬報嘉善遲待望後與句生絜樽肅
承清論春寒峭緊珍重不宣

窮居渺徒好念子意彌愷言笑曠宵晨情愫眷疇昔睇
雲旣已深撫時屢云易薄質罕寸長惠顧負三益矧乃
嬰宿疴辱命枉尺帛渥言我豈敢高義子孔碩惜惜聆
素絲璨璨覲荆壁罔識游天鴻下儕退風鷁君子勗明
懋葑菲亦采摘行當酌新樽聊用永朝夕

星台書屋落成招同句生琴甫過飲談藝追往意
觸成詩

羨子墻東隱清齋事事幽養疴違俗遠習靜契冥搜門

春風集 卷四 三
巷空寥落詩篇合唱酬好須隨問字載酒與從游
苔濕延階滑花深礙戶低小童時汜埽佳客每招攜入
饌翻泥筍登盤飴座梨醉餘懷舊感欲語意都迷
橐筆憐童稚論文獨有君自能橫逸氣誰道惜離羣碧
海懸秋月青霄捲絳雲寸心勞夢寐何處證多聞
顧我慚荒落清吟首自搔望洋龍掉尾失勢鷁摧毛偶
廁春風坐偏聆白雪操多君頻鄭重月旦謝梅陶

大隄曲

春水汎桃花鳩鵲戲浦沙湖光黏草合橋影度林斜公
子青驄馬佳人繡幃車朝朝豔游樂歌舞及棲鴉

憶高五萍客

幾年憶爾越州城不見征鴻慰我情江上浮雲看更遠
天涯芳草踏還生何人下士延徐穉無處憐才薦馬卿
寒食東風舊游地淮南景物又清明

朱蘭洲移贈玉蘭今作花矣賦此柬之

贈我蓬山瓊樹枝故人情意重如斯十年舊雨花邊夢
二月東風檻外姿豈異李桃投永好佇教珠玉想移時
書堂從此添芳色肯對春光來賦詩

酬星台作

憐君好學苦不足一日裁詩三四幅詠言呻痛常辟人

和履言集 卷四 四
但覺風前振珠玉病裏春光莫浪過堂堂白日易銷磨
海棠醉雨胭脂濕明日從君花下歌

喜晤朱鐵琴

憲會

卽送赴洛兼柬范雨村

凌夔

籍甚朱公叔新知尊酒親纔過寒食節又作洛陽人晴
翠山邀馬烟條柳送輪幾時逢小范爲話故園春

春雁

底事頻南北歸飛似不前鳴哀仍萬里旅食又經年廓
落雲天濶飄飄歲序遷誰家挑錦字寄爾玉關邊

青桐篇

并序

余室西偏有古桐一株焉種未紀於何年譽不

聞於嘉客交柯接葉聯理蟠根庭戶賴以生幽
琴樽因之潤色昔槁一本今抱孤生猶復亭亭
居然鬱鬱繁余幼采嘉實坐蔭清光樹匪期以
十年枝已翹於百尺讀書秋倚染翰朝搦與圖
史而相親類友朋之結好每至繁華謝節柔綠
晨敷碧草萋寒芸黃夜隕枝變聲於好鳥葉送
響於哀蟬齋閣蕭寥涼濕一庭之露簾櫳掩映
香飄五月之風未嘗不樂以棲遲佐茲幽討其
或驚飈振蕩急雨飛馳挾危勢以崩雷撼大聲
而壓屋啾啾蟲碎隱隱燈昏則又遠夢墜而將

沈壯心悲而欲死嗟嗟山幽桂樹王孫動招隱
之情漢水楊枝司馬泣攀條之淚殷東陽庭前
之歎杜少陵江上之歌莫不感觸成文流連遣
興矧余窮巷閉門幽憂終歲等不材於樗櫟甘
荒落於荆榛待價龍門不見伶倫之過含靈鳳
穴何來鸞鷲之棲尙冀夔遇中郎據宜施惠聊
抒短詠用遣幽懷

拔地冠羣木扶疎被中庭元泉漑根柢天液滋幽馨用
以製琴瑟樂奏通仙靈良材不世出此意空冥冥

題胡豹堂水西詠雪圖

水西涇縣南郊

積雪澄寒影羣峯正悄然雲橫敬亭樹風奏蓋山泉偃
息耽歌詠清冷颺管絃迢迢涇水上疑泛子猷船

七夕寄句生

并書

夫蕭艾之感且詠風人疏麻有歌尙遺郢客矧
跡阻於窶貧思勞於病困者哉自違清塵倏焉
徂暑久離鉛槧時近湯藥進退之不得如坐囚
拘呻痛之日聞動驚心魄童蒙環噪於坐側惡
鄰喧鬪於互鄉身非木石何能當此未嘗不假
文翰以寫憂託篇章以遣興而思未設想感奪
辭前意甫結文恨餘篇末庸愈夫馳騫錐刀徵

逐觴豆者哉乃知虞卿奮筆於窮愁韓非著書於孤憤猶得其似而未得其實也惟大弟與予相憐同病敢陳舛鄙畧爾言之乃者大火流天清商變候病氣疎於秋風藝事觸於令節神馳烏鴛夢轉星槎牽課短詩薄抒弄好倘履綦之遙臨或英莖之迭奏解疴振曠激切良深

仄輪懸半月聯影匹雙星瑤瑟秋絃汎薰篝夜火青梁辭將別燕庭墜倦飛螢幽蘭已盈把爲爾折芳馨

和西御四詠

秋蓮

水國涵秋豔潭花澹欲空影沈妝鏡月香散棹歌風逐鷺翻殘翠吹魚墜冷紅江南猶有曲清怨幾時終

秋柳

倦舞風無力秋絲自縲絲弱垂今夕露青鎖舊時烟低拂雙歸燕空藏獨咽蟬江潭搖落感司馬最悽然

秋螢

零落清輝散孤飛獨夜闌度窗隨燼暗入樹逗星殘露重看如墜風高數更難上陽團扇恨秋草故宮寒

秋蟬

亦復餘孤籟笙簫百不如影微兼葉落聲斷入風疎抱

日寒情促吟秋遠奏虛相憐元鬢好蕭瑟眇愁余

和春谷先生展七夕

靈匹千秋在仙期匝月遷羽輪淹絳闕瑤醴續華筵舊
錦雲仍障新鉤月又弦鵲來驚復駕牛去待重牽欲會
還成會無緣却有緣樹深仙籟囀樓迴夜絲懸竹珮敲
風響桐珠泣露圓試從銀漢外更指玉繩邊

八月十三夜對月

秋輝靄靄澹澄空銀漢低斜夜正中風外機聲抽絡緯
閣邊琴響奏梧桐流連物色清如許展轉心情望不窮
更憶明年當此夕照人吟賞却西東

凝望西軒影漸斜金波脈脈浸窗紗吹人遠夢當樓笛
落我秋心滿地花却好今宵偏對酒須知來歲正離家
捲簾滅燭愁多少憔悴琴書感鬢華

輓練江

識君已恨十年遲玉樹長埋繫我思到此文章真賺命
却教風雅欲從誰阮生放曠嵇生達小庾辭華小謝詩
獨向黃壚尋舊跡清秋聞笛不勝悲

湖上餞季子入都

短棹將離客秋湖敞別筵柳依衫袖近蓮對酒壺偏旌
戟承家德風流賴爾賢何時拜 宮闕寄我 帝京篇

過傍花村徐氏花墅

乘閒尋北郭秋意滿疎籬鳥下墟烟夕雲低落日時幽
居過客少初菊待霜遲更與期重九登高來賦詩

病去

病去憐身在愁來擁鼻吟半生隨夢淺百事與心深落
葉林中竈秋塵壁上琴清齋重拂拭幽意且須尋
積雨偏逢夜疎燈獨自花寒聲將漏寂清影共簾斜躑
躑空何事飄零信有涯欲知蕭瑟態潘鬢久如華

和西御蘆花

隔水望紛紛微茫總不分沙虛搖岸月風急捲江雲動

蕩漁收艇參差雁下羣相期何日見愁緒亂氤氳

九日春谷先生招集偶齋遇雨遲句生不至

樓迴秋將夕烟霏暗不開感時驚雁過聽雨滯人來暝
色延蘿徑寒情駐菊杯偶齋三度約天意底多猜

與楚楨游西郊

卽境洽真賞達人貴息機與君咸盛年入世多所違吾
希仲長統君慕臺孝威俗習等糝垢適已詎云非幽契
結心知有會輒相依蕭晨入我室攜手薄郊畿天高秋
氣寬清風滿寒衣野籬耀叢菊簇簇霜中菲延遠矚長
薄登高睠餘暉吾心快深適衆情良悟希仰觀鴻雁翔

刷翮天路飛覽物續高唱與爾同所歸

十二日對月

月迥宜孤詠披衣坐夜闌望中蟾動影空裏雁驚寒續
極生愁遠光多惜夢殘此時幽絕意須向玉琴彈

哀二友詩

薛子韻

傳均

學粹命不榮悲君得天薄除却好讀書慘然一無樂盈
縮固有在矧乃命難渡到今年卅二雖困未衰弱苟非
心先死何遽遂寂寞三年不見君言笑憶疇昨生平飽
經籍萬卷肆淹博觀書五行下邃密尤小學酷嗜許氏

書謂云五經鑰文章富根柢掇拾窮搜索自從二徐後
錢段廓垠墜深宏更貫弗得君大張拓乃知六體書古
義非穿鑿鈎稽甘寒暑著述滿囊橐昔嘗就問奇載酒
與斟酌有疑必我析俗論解纏縛譬如行黯黯爛然萬
燈灼屈指幾相見飲食展戲謔看花弔隋苑訪古遠郊
郭泛舟及包劉涇包孟開寶應劉楚植儀徵劉孟瞻遂結注書約最後與
君游風景極為惡棲棲白下城佳會都忘却我時病早
歸聞君訪邱壑戊子秋試後子韻及孟開孟瞻資叔游金焦山余以病足先歸金焦兩
山秀卻曲慚芒屨無何同瑁瑤各自被淪落此意雖可
傷真如玉抵鵲不意偶然事君歸無住著天旣嗇君遇

禍變不可度進退俱不能吁嗟就闕幕子韻於撤棘後遂游閩督學陳

石士侍君心恥干謁誰令撤藜藿是時十月朔送別倦

郎幕包慎伯先生寓齋迢迢江上帆孤舟遠飄泊中間過吳越

佳製爛丹牒江山煥文藻靈秘歸羅絡知交得府主文

字異酬酢大吏虛左迎為君刊述作浙閩制軍孫公平叔議刊子韻所著

書高才聊獲知鄉閭小儒愕曇花偶一現嗚呼入冥漠

我時聞凶耗躑躅兩足躍海陵百里隔尚冀傳聞錯時余

歲試歸來哭君殯虛堂障綃箔斯人天天年哀哉孰為

虐長汀在東南瘴癘古多瘡靈蛇雜羅神睢盱類熊羆

三都鬼髮鬚君靈竟何託招魂望越嶺天長莽寥廓比

年弔同志相顧俱落魄就中惟包汪早君駕雲鶴涇包季懷

世榮儀徵君死更殊方無處薦盤勺灑淚哭秋宵悲來

骨如鑠

汪小城穀

少小溯同學莫如君最親出入共里閭初度俱甲寅我

生月在未君生月在申後我十九日愛我如一身誦讀

與嬉戲喜怒皆任真總角便就塾藹然和且純生平二

十年貌淡心如醇我幼最傲誕師友常怒嗔惟君曲護

我不顧人笑嘖君生性篤學刻苦志不紛虛衷復深思

常若不及人雅度具儒行同輩無其倫昔年甫弱冠文

望高嶙峋白鳳異凡羽赤鯉超常鱗橐筆赴有司一試
輒冠軍與君游泮宮又在丙子春錦帶執禮器青衿賦
采芹從茲更肄力業攻制舉文我志最瓠落學殖如荒
榛君乃亟勸我鄙棄兼因循有時一來過絮聒萬語勤
無何四三年君游東海濱歸來復備書館粥不救貧朝
誦日至午夜書時及辰氣弱浸憔悴十日九不曙甯死
不舍業遂與病爲隣初聞始病肺咳唾日百巡唾盡繼
以血孱瘵心如焚倉皇誤庸醫誰識病所因桂附雜芹
翹那能寒熱分百藥苦無效柴瘠氣不振灰心絕仕進
乞命延絲繆甫聞病少差卷軸還紛綸潛究地志學左

右圖史陳以箸畫示我瑣碎窮沙塵餘力更工書八法
得古神自謂若假年不至無所聞嗚呼戊子冬大命逢
艱屯我時問牀榻執我手殷殷相顧淚如雨痛楚兼吟
呻少頃速我去死別風摧輪相知失聲哭流浪涕霑巾
哀君行無傳悲君學就湮賚志赴泉壤君爲極艱辛宣
尼歎苗秀天平胡不仁狗兔飽跳躑不祥竟騏驎蒼楸
當衢路蘭桂偏燒熏從來理曹昧蒼蒼何足云重以今
年春愛弟病如君小城五弟季雲程於庚寅春歿有才各無命地下爲
機雲

和沈生羨門癸秋眺

高原聊駐目倚杖趁秋光橘柚人烟少風雲鳥路長野
游依落日寒緒警新霜偶值歸僧話清鐘出上方

觀內子自錄詩稿慨然賦贈

林下風期數暮晨蘆簾紙閣鎮相親何曾藥餌供多病
但覺糟糠不厭貧花底調絃偏識曲燈前作線好傳神
最憐擱筆蕭條話未免琴書別與人

題問公幽澗鳴琴圖

吾鄉琴學甲天下昔有妙手吳先生

吳仕柏虹著
自遠堂琴譜

先生

老去歎絕響往往弟子傳其聲有僧仙機早入室顏丁

先後同師程

丹陽丁勗初
儀徵顏有常

三人一法各異造功力所至

通精靈仙機擅長七十載不以教習專師名晚得問樵
罄所授如傳祖法心燈明祇緣幼慧早入道廿年操弄
無他營我昔初聽雁堂側已清俗耳箏琶鳴到今幽澗
更入妙非絃非指皆天成剛柔徐疾各應度萬籟百族
空中呈禪心更與化工並不緩不急和且平幾年擲鉢
向吳越抱琴獨去空山行寫圖寄意先示我忽復睽望
心縈縈我亦安絃學來久幼親師說顏與丁尋聲合度
未了了坐覺百慮牽塵嬰有時移軫發幽愴空聞絃索
聲鏘鏗乃知學業重所習問公絕藝誰能爭邇來疊聽
更無已令我遠憶蒼茫情

道光十年十一月五日 先君子遘疾越明年二月十一日遽罹大故彌留之夕執手訓之曰汝讀書學爲文必先學爲人汝慎哉植之泣志之不敢忘茲以苦由餘生三虞卒哭敬述遺訓哀而成詩

讀書親不榮有子不如死哀哀我父終顧復尙無已詎知不肖軀百行無一美追思屬纊言孤兒淚如水

踏雨過建隆寺訪問公

清響鐘魚晝寂寥禪關鎮日雨瀟瀟
竭來偶與維摩話躡著芒屨過野橋

病呈陳郁齋妹丈

壽文

補天塞海古來無此恨孤兒淚眼枯
苦由餘生難遽殞文章虛願豈良圖
昏燈夜雨愁千尺破屋秋風病一軀
我已不堪猶愛護哀歌聊復爲君呼

句生游浙赴吳退旃侍郎學幕余時居憂不敢賦
別近甚思想

倥傯憐君賦遠游那能樽酒竟淹留
春風鶯燕皆余泣越國山川獨爾愁
竹箭由來南土美蓮花應與衆賓侔
秋風早發錢塘棹珍重高堂已白頭

中秋雨

和周詩集 卷四
偏是中秋雨淒淒濕淚痕望雲期月色搶地慟親恩寒
吹紛簷溜悲風隔墓門庭前愧烏鵲啞嘶繞枝喧

病

不敢身言病哀吟淚獨彈生涯真錯迕壯志與摧殘目
盡天無路心枯海亦乾小人猶有母都覺死生難

憂中聞諸戚好赴省試

哀歌空度日忽漫送諸公江冷芙蓉水天高鴻雁風錦
標君奪取麻經我孤窮七度清秋會嚴親望眼空

愁坐

愁坐燈花落虛堂夜氣昏風烏驚晚葉寒蛩泣秋根恨

極身猶在哀多病不論卅年懷祿仕生養愧雞豚

問公詢余病服地黃翼日攜贈賦此鳴謝

上人何愛我心契屬存亡問疾真能療偏勞餽地黃養
營滋腎督益血起羸疔定獲慈悲力秋來體冀強

賣被翁

清晨過北郭有翁負物來佝僂執杖病且死一吁一步
三遲回硯礪敗絮散不屬滿身垢膩兼塵埃行人見翁
多歎息問翁今年年八十明知死在須臾間其奈三旬
難九食此被價值能幾錢今日易米明復然勸翁留被
贈翁值翁且負被歸家眠左手持錢右執杖再三泣拜

前途望已經身與鬼爲鄰只願明朝和被葬我聞翁之言掩耳出郭門中心惻愴不復論翁今生逢屬聖代老死尙不飽且温嗚呼爲翁聲已吞

換錢丐

鼓吹始畢白日斜乞兒羅列都轉衙觀者駢闐道路塞換錢雜還爭喧譁我過聞之心始怪那有多財換錢丐問丐何從錢換人衆人告我小易大往者行乞多大錢今兼白版紅麻鉛白版紅麻時俗小錢名買餅易米百不值以二當一輕重權人數大錢買丐數小錢賣可憐十乞得五錢猶說乞兒還市僧近聞太守官閣開嚴禁私鑄法若

雷羣兒不久遭鞭撻便換小錢誰得來

落齒

我年卅八齒已落見齒脫口心錯愕古云四十正強仕况今未及先衰弱一齒齟齬五六年防風惡熱痛如鑿甘瓜入口等敗絮小飯大歡安能嚼有時痛極夜不眠直似針錐雜蜂蠹往往詢醫乞却盡願求上下空齟齬那知齒墮心轉傷兀坐低垂慘不樂今春遘凶我失怙負戾不死天爲虐銜哀躑躅心已枯血氣如何不綿薄此齒旣落那復存行看一一如秋穉吁嗟齒落則已矣觸我憂傷猛無著憶昔吾親生我時四十五年頭未白

艱難困憊身轉强大肉硬餅如刀削豈無違候犯寒暑
醉飽嬉游常勿藥年及八十始道衰不杖猶能徧郊郭
我時雖懼喜轉多尙幸吾親神矍鑠不信山頽白日黯
驀然大故空中作寢疾百日父告終病裏憂兒太蕭索
我今落齒親已亡哭向窮泉親聽却回思含飯具小斂
楔齒依然見參錯我較親年未强半此身生死真難度
讀書無益飽飢寒病妻老母甘藜藿人生到此信有命
拔劍哀歌從地斫一死何能贖罪愆茫茫後顧將安託
哭罷挑燈拾齒看雁啼鬼嘯天寥廓

忽忽

忽忽真無奈吟詩且告哀數風看落葉坐雨對寒苔肺
病辭書卷心傷禁酒杯柴門終日閉親舊幾人來

劉氏小園余幼假讀書所也重過感賦

小徑深叢兩竹扉董生於此夢多違寒籐網戶秋陰遠
禿樹依樓夕照微燈影對人存也未書聲喧客聽應稀
舊游處處堪惆悵立徧蒼苔却忘歸

九日冒雨同燕孫游傍花村

愁坐不出門寂寞守環堵今年重陽節憂迫最悽苦枉
子入窮巷破帽走風雨招我且近游褰裳踏寒莽過橋
涉村墟泥污二寸許豈無籬下菊顛倒雜塵土空村絕

人行落落門巷古惆悵眷舊蹤往者人蟻聚世事那可
料烟中雁來語

薄暮獨游傍花村

我心鎮日虛空住獨自無言對庭樹忽焉萬慮如波濤
且問黃花出門去花隔疏籬人幾家黃昏雞犬寂無譁
此間過客誰知我獵獵西風吹帽斜

柳蔭庵碧溪上人招飲觀李瘦仙先生詩軸

素縑猶在壁斯人已重泉負哉雁堂東復見羽化仙寥
落數百字高情生古妍秋雲舞瘦鶴包慎伯先生評瘦
翁書如禿翎老鶴
百鳥皆隳顛世俗那得知偏被智永憐護持積歲月多

費托鉢錢碧公爲瘦
翁刻遺詩我見忽感激把酒思淒然醉眼瞥
龍跳共到秋墳前

齋中夜讀賦呈春谷先生并書

昔人謂詩須無一字無來歷夫摭實之有自固
較然矣所難者虛騁寂施言皆有物蓋徵實有
際傳虛無涯涉顯有端致潛無迹植之讀先生
詩往往有漫不經心久而後知蘊蓄之所在者
如見家人搏雪獅云超超元是絕氛埃謂尋常
疊字耳及閱南史劉顯傳黃獅子超不及白獅
子超乃知所自也病暑云五內卒煩悶心知爲

暑傷掉眩百脈轉誰云堪自強謂質直語耳閱
晉書皇甫謐傳隆冬裸袒食水當暑煩悶又東
觀漢記光武中風吐眩有白大司馬亦病如此
自強從公乃知所自也寄施南文太守云城郭
青山對素秋謂清詞取致耳閱少陵鄭典設自
施州歸詩青山自一川城郭洗憂憾又寄裴施
州詩冰壺玉衡懸清秋乃知所自也渡洞庭湖
云而我亦長嘯猿啼鴻鵠驚謂當前點綴耳閱
嘯旨十五章六曰巫峽猿七曰下鴻鵠乃知所
自也石首魚歌云肌肉豁挺疎非堅謂挺鍊字

耳閱曲禮鮮魚曰脰祭注訓脰爲直又士虞禮
記注古文脰爲挺乃知所自也朱素人許作山
水云晚照秋嵐宜北苑青蘋白芷待鷗波謂隨
舉屬句耳閱夢溪筆談董源尤工秋嵐遠景又
嘗畫落照圖遠峯之頂宛有返照之色及子昂
題西谿圖贈鮮于伯幾詩綠蘋齊葉白芷生送
君江南空復情乃知所自也元祐黨籍碑云留
傳脫令舊本在身通何異洙泗濱謂服膺推贊
耳閱史記仲尼弟子列傳受業身通者七十有
七人

索隱云文翁孔廟
圖作七十二人

又梁谿漫志元祐黨人

只是七十八人

揮塵後錄元祐黨籍初止七十三人

乃知取義於

人數相等也九日蕃釐觀云憶來蠻嶠酒窺去

潤州花謂上句憶宦粵情況下句覩隔江景色

耳閱東坡丙子重九詩三年瘴海上越嶠真我

家至亦復彊取醉謹謠雜悲嗟云云又續仙傳

周寶鎮浙西殷天祥致潤州鶴林寺杜鵑九日

盛開乃知運用爲天然渾合也哭萬和圃師云

岩堯華不注疑音或齟齬耳閱左傳釋文華如

字又戶化反又詩常棣箋不當作拊釋文不音

如字又方浮反乃知衆音之已犁然謝人送桑

椹酒云甜甘却可人疑字或重複耳閱晉書張

天錫傳桑甚甜甘乃知一字之非率爾凡以澄

思獨詣績學兼權恒言而隱寓深微隻字而貫

穿宏富植之隨讀所喻莫名多奧聊舉十端可

知吐納菁英無非浸釀以金融范非木歆輪此

雖象外神明實乃包中臚膜會其指要古今息

息通焉夫臆膈之謂性靈肆麓之爲采色可以

語小非典則也體學大備之後豈能清晨登隴

首而已乎輒獻一篇欲附於蒙莊之質然否幸

併教之

造物蘊真采撰泄流文辭敷麗適衆變能者如天施所
貴破萬卷要使形迹遺不惟擅深厚道在鼓鑄司夫子
挺盛業妙契天人姿蒼萃具滿家天使昌其詩授我卅
萬言美哉麗則垂字句及篇章律中山不移習深會所
觸謬慚蠡筦知請俟百代賢誦說爲闕疑

嵇庵詩集卷四終

嵇庵詩集卷五

江都 梅植之 蘊生

贈碧溪上人

碧公眞絕俗學佛更工醫妙得長桑術傳來指地池清
風竹林遠香雨藥苗滋幾次參都講招提問我師

題飲泉先生寒林獨步圖

圖悼亡友鄧溥
泉李練江作

平原邈蕭颯嗚咽聲滿紙誰爲咫尺圖惻愴我難已林
中之人獨有君噫嘻那不嗟離羣陸生所歎君復歎從
來逝水兼浮雲黃公壚西州路彥先牀上琴不彈文舉
樽中酒空注古今生死交到此誰能去噫嘻君欲歸何

和履詩集 卷五
處寒林落日西風樹

薛生介伯壽近詩肄力甚進說而贈之

小庾誰能似新詩許自誇簾疎風韻竹雲散月搖花十字

介伯不必人爭羨應教我獨嗟寒宵欣載酒乘興若無涯

立春後十日送楚楨赴皖江學幕

明朝君發真州路纔到春來君已去春色愁人逐遠行
語多不得伸長句西望江流一線分相思搖曳渡江雲
敬亭山色天都瀑多少清光正待君

歆枕

歆枕雞聲次第催斷魂迷散喚難回百憂那解心如結
萬死都教骨已灰何處求生謀壞室無時竭力補蘭陔
縱將文字兼歌哭目盡窮泉淚眼開

先君子忌日哭述

今日分明似去年孤兒此恨直呼天何時侍養從泉下
終古銜哀在社前微愛敢邀兄曲宥餘生幸賴母能全
閉門獨自吞聲哭淚漬藜羹化紙錢

翫墻下苔色

春來不可見牆下苔已綠延緣固未徧屈曲偶成簇雨
氣藹初陽新機尙深蓄窮巷絕車馬閑情聊眷日更有

凌寒姿青青隔年竹涉趣各成性悄焉媚幽獨

題古農結交青松圖

人生到處可託足君思乃在青松白石之深山似非無
情謝儔侶如何結契雲霄間松枝百尺不可攀泉流瀉
出聲潺潺攝衣得向此間去可以高步凌烟寰羨君綦
屨清且閒豁然令我開心顏眼前萬事等芻狗及茲芬
亂皆從刪我今四十鬢已斑涉世不啻羊腸艱若不與
君散髮抱琴共來往必當高臥甘荆關

題飲泉先生歲寒觴詠圖

主人有酒歡今夕不飲當筵誠可惜坐中莫問誰賓客

都是天涯同落魄君等且酒聽我歌我歌激越哀情多
彭殤跖惠同一科安問位置天如何蠟燭成灰夜將半
短後之衣不掩胛是時我已心煩亂醉聽雞鳴再三歎

春恨

簾影淒淒動湘竹步入花邊對花哭回首趨庭佇立時
多情草色年年綠

清明

寂寞清明節淒淒不似春燕來愁顧我花好笑宜人獨
坐千行淚哀歌七尺身飄零愧書劍豈獨是長貧

建隆寺看白藤花題問公禪房

此地屢迴複清僻我性宜及茲籐作花破曉一觀之藹
藹檀林端裊裊寶樹枝甫聞衆香散忽見千花垂蟠龍
雜白鳳屈曲兼倒披信是來諸天不然素女遺是時首
夏交繁霜慄人肌東堂對初日坐覺寒不支開簾見懷
素焚香正臨池染翰昵階下似與花爭姿我來會所適
徘徊去仍遲

感秋偶成

倚壁書空不自由無言凝睇轉悠悠從來天迴堪雲換
誰見川移但水流抱葉哀蟬先受露繞簾別燕欲辭秋
升沈那待君平卜付與詩篇獨唱酬

生事微茫任太虛一椽蕭寂且閑居人天果是靈根種
智慧珠從性海儲滯跡何關風逆羽苦心空冀日迴車
當前塵夢都銷却剩有琴書習未除

望牛女

曠望仙槎遠秋情落萬家星迴翻斗轉河耿瀉銀斜暗
蜚依庭礎飛螢繞扇紗烏梁如不隔鳳駕儼非遐帶結
雲邊字機張霧裏花女牀何處在寂寞歎匏瓜

秋日書況

戚戚竟何補悽悽難具論悲來都刺骨泣盡更傷魂獨
自望雲歎有時隨鳥言端憂徒百結聊復坐西軒

秋夜

寂寂虛堂度日遲
閉門枯坐也相宜
螢飛漫點書千卷
花落空浮酒一卮
明月自來窺遠夢
碧雲何事引秋思
寸腸爭及羊腸道
輾轉車輪十二時

題溪山行旅圖

溪水繞春山水長
山亦遠蹀躞馬蹄遙
躑躅牛足踐客途
倦游歷涉境窮眺
眄密林藹森雋新流
亘迴轉墟烟逐轂
上巖雲入衣卷詎
惜徒旅疲復假琴書
遣遯矣千里思冷
然遠風善從來賦十
役辛苦為誰辨

步孟瞻別號詩元韻

回首風簷幾萬間
到來七度鬢毛斑
虛名未得親先逝
不獨窮愁坐掩關

記曾僦屋與包劉

戊子省試余與孟瞻楚楨子孟開同寓辛卯孟開亦居憂返里楚楨復游皖

幕孟瞻以事見率亦不赴試

忽漫分襟幾處秋
天意難知人事幻
對

君心似泛虛舟

哭瘦生弟

慎之

相隔未匝月便成
生死期嗚呼天何辜
教汝天折之汝行
殊老成汝學能文辭
愛汝益礪汝激切汝
不疑弟行雖多人汝
長宜先資憶汝甫十
齡就我問字時落筆
便穎異相期學無涯
去年著一巾十次試
有司此事固瑣

瑣亦云命數奇汝時賦青衿我時服斬衰呼號苦由中
見汝暫拭淚八月秋風歸又聞汝試遺我見百勸慰最
汝早下帷今年游江洲數月與我離前日冒暑來知我
爲汝思劇談語未罄唏吁各低垂廿日汝邁凶恍如斷
我肢憶汝若夢寐涕泣悔何追汝學我無助汝病我莫
醫汝死尙望我惻惻中心悲慟絕撫汝棺魂魄焉能知

郊行

幽興憑誰寄遙村漫獨尋夕陽秋草遠碧樹晚蟬深
虛與風相御清如水自沈此身隨所適空外且孤吟

同人飲虹橋酒肆

落日招攜過野橋烟霏寒碧路迢迢幾人顛倒欵巾幘
益我疎狂縱酒瓢湖納星光天在水風傳秋籟雁摩霄
談詩說劍形骸放醉眼瞢騰蠟炬銷

送楚楨歸寶應將赴保定

并序

道光壬辰秋九月寶應劉君楚楨艤舟河干挈
孥旋里東門旣祖臨水送歸言將來歲設教於
北平也余與楚楨淡水夙期漸蘭靡已幸承會
輔之助未竭仰鑽之能尹班陶陶愨符曩哲周
閔落落情有若茲可謂意寫心融道同迹泯君
以泛宅江淮淹居歲月邊孝先之博學授經無

人梁伯鸞之孤高寄廡何地暫入邠生之幕又
返子猷之船倥偬琴書棲遲僑舍而橫經之塾
遠隔菰蘆負耒之鄉半爲魚鼈虛懷樂志之論
忽歌行路之難余賦別而黯然君自此而遠矣
乃者繁霜變律賓雁驚秋日晦靄而短暉風蕭
騷而異響寒湖波大平楚烟荒俶乘書畫之舟
更走風塵之騎雲瞻日下天蕩蕩而靡涯路入
河間車班班而遠去回思稠接琴樽杳如墜雨
而遞瞻魚雁遙企停雲空勞明月之詩用代河
梁之詠

木落雁飛愁清商九月秋我當多病日君忽載書游歸
思非張翰長驅異馬周緇衣投洛土匹馬度幽州楊子
浮雲遠桑乾黑水流近天瞻日角作客坐樓頭道左歌
驪別長筵設醴留故人應好在淮海夢悠悠

重送楚楨

試燈風裏扁舟別記得楊枝爲君折無何君復遠行遊
又見蘆花白如雪輾轉秋與春離懷難重陳前有一尊
酒未飲先傷神憶君昔作眞州客一見與君心莫逆無
端喜結孟氏鄰況復情聯管生席守道君落落說經君
鏗鏗冰壺玉尺朗然在照人眉宇光華清我生疏放最

潦倒與君懽愛真心傾懽愛如君知有幾到此踟躕更
難已留君不得翻送君幽并淮海三千里河流沸沕山
嶙峋朔風如馬催車輪長安宮闕若在望此行早見
京華春鴻雁南飛君正北落日寒烟黯離色別後心情
那得禁舉頭明月時相憶長歌復短歌低徊無奈何請
君且住為佳耳人世窮愁離別多

宵深

宵深聊隱几無語對燈花亂柝風敲碎孤鴻月叫斜愁
來疑泛海氣往直凌霞莫漫悲搖落催人奈歲華

海陵夏退庵

全

以宋刻姜君墓誌拓本介楚楨屬

題

楚楨示我墓誌本云是退庵之所貽方平端好數百字

刻為嘉祐姜君辭姓氏雖存闕志乘想見懷學兼好施

誌云君饒於財能好施又置全監書於學宮餉學者鄉人賴之

退庵得之自僧舍豈非

寶護煩毘尼招賢壠墜鞠蔓草

誌云葬於海陵招賢鄉

墓田冥漠

知為誰脫令當時沒此石其人豈不真嗟咨嗚呼文字

發光怪千齡照灼輝長離若僅財雄侈厚葬黃腸金井

夫何為廣陵東南大都會到今金石渺所窺射陽墓扉

昉炎漢

石舊在汪容甫先生家今為楚楨復移置寶應書院

宜匹中殿三公碑

石

乃阮相國訪得今嵌置學宮及疏理道準提禪寺僧廊

李唐僅見萬氏誌短章尙

足傳風徽

石方約一尺有百餘字刻以大唐大中豫章萬氏夫人葬於楊子縣之江濱鄉石在江都

故文學朱

天祐一石最可惜獨剝姓字人莫知焦君考

古極奧博北湖小志仍闕疑

石方約二尺字跡完好獨闕葬者姓字其文疑為楊

行密亡將今在焦氏半九

其餘露筋米老筆傳聞原刻

書塾北湖小志有考釋

此石米海嶽書今戲鴻堂有摹本故甘泉文學

人驟之

歐陽蜀江先生曾以原刻拓本見贈云石在高

郵孫

東隱經幢信唐物今名萬壽寺御史臺刻傳伯機石在鹽漕

從來古物信可寶埋藏幽穴尤難期豈無光靈偶

時見敲火礪角兼鋤犁似此完好那易得若非博雅誰

參稽吁嗟姜君死不朽曠世相感命何衰謂退庵考誌文退庵

捫石將文披

夜述

燈殘尙不寐仰屋無復情霜風墮寒瘁笑如人夜行端

憂向誰訴愴焉百慮盈自昔慣耽幽到此心轉驚念長

日苦短身重名亦輕自然罷投筆亦復絕請纓徒懷

北闕志並無南山耕四十尙貧賤何以爲平生

送趙日修之河南

何事翩翩賦遠游朔風驅馬入商州幾時路出夷門道

此日寒深季子裘北顧邯鄲真北走東瞻河洛自東流

傳聞折簡梁園客可是鄒陽舊好儔

讀列仙傳戲題四絕

五色通靈百寶成
得來好向九天行
左龍右虎丹臺術
不與凡夫說姓名

顛倒羲皇八卦圖
人間何處索元珠
不知天地從何貯
漫道壺公壁上壺

今古茫茫幾列仙
試經爐候契真詮
金膏水碧尋常事
要與洪崖笑拍肩

萬里乘風汗漫游
白雲明月自春秋
欲從太素參元氣
更上昆侖望九州

元日

歲長空深恨孤兒那復云
雪消潛入草春動遠來雲生
死關天事低昂逐物羣不堪年
四十豈獨是無聞

人日雪夜客以朱丙南畫梅來
易米者清寒若此
然而雅矣余讀華嚴經畢卽興題之

無端春色滿天涯
茅舍瓊樓到處家
風雪年年寒透骨
不因清苦不開花

淋漓水墨偶傳神
碧雪香雲認未真
笑亦關情愁亦好
由來姑射有斯人

風能吹色月能香
俗眼模糊說短長
自有英華關咀嚼
道人權作饋貧糧

一燈春夜讀華嚴窗外無聲雪漸添清興忽來吟不得
忍寒索笑幾回拈

挽葉竟亭先生 文光

親切書堂地紛披蕙帳懸師資崇夙望佳譽荷虛延摘
藻規徐庾研經續勝處大名標綺歲頤壽享椿年作賦
哀時命銜杯樂聖賢鷓飛遙避嶠魚曝屢悲淵顛倒糟
醅意升沈筆墨緣東方天上客摩詰病中禪高擁春風
坐如陳法雨筵百家翻藝海七畧瀉言泉老去才難盡
頽然勢獨堅斯人嗟萎矣吾道或終焉趨步追疇迹談
諧入妙詮推袁勞翦拂御李奉周旋駑駕虛驚樂哀音

錯契涓愛容樗質護情及蔦姻聯鳩杖神如接鸞觴莫
忽前琴魚空入海丁鶴竟乘烟誰舉龍文鼎徒傷薤露
篇絳帷虛寂寂草帶綠芊芊慧業須成佛通儒卽列仙
嗣賢齊勃勳家學紹談遷高密應傳宅瀧岡定表阡疎
庸邀末契回首倍悽然

題問公海上移情圖

杳然振飛錫抱琴滄海中跣趺拂玉徽妙響盤虛空恍
惚須彌顛突見三山峯法雲垂波瀾溟漲翻魚龍人天
了一切十指生長風負哉塵境絕遂與天籟通此情誰
與傳有曲皆神工我生習操縵亦復調絲桐驤首望嵇

陶夢寐安所從披圖曠心目因之扶桑東

天台山歌贈國清寺僧招南

有僧來自天台山家在東南雲海間我聞就問天台路
云說天台最高處玉洞霞從鳥外飛香林鐘入雲邊去
天台瀑布橫空懸天台桂樹含古烟朱闕瓊樓問誰到
青羊之客丹邱仙却聽天台言更對天台子飛錫胡爲
今在此此時聽我天台歌歸向天台應憶耳

歷歷

歷歷分明強自禁幾回噓壁漫沈吟形骸可笑當場夢
歌泣無聲未死心百變烟雲空外遠一龕風雨坐中深

蕭騷不是關秋氣擬向何人索解音

漫說吾生竟有涯仰天一觸也長嗟燈前作態真疑我
夢裏思歸那信家謾謾滿天風蕩木淒淒落地雨沈花
含愁宜笑空何事如此因緣鬢已華

出門

此去吳陵道心情不似前病身如槁木老父已重泉豈
賴文爲活徒傷恨莫填讀書三十載流落不成緣

仙女廟

仙女今崇廟當年聖母祠仙蹤傳最異漢代盛於斯寶
髻金花鞞靈衣玉座披野風吹藻仗恍惚降雲旗

舟泊孔家涵

風水聲如吼真驚客夢空乍疑風蕩水不辨水爭風近
市須更發防舟察火紅平生能犯險於此覺心忡

過宜陵鎮訪宗定九先生故居

柔艣沿流傍水村曉來篷背著霜痕雲開海色朝光炫
市雜晨炊野霧昏蝦菜隔橋同聚買柴車待渡各爭喧
及今耆舊談詩客尙說梅岑有竹園

吳陵客思

短棹沿河住衝寒犯海隅文園羞賣賦東郭笑吹竽積
雨鄉愁遠殘燈客夢孤暫游聊復爾不合稱長途

同人游泰州光孝寺

紺宇嵯峩斷堞邊殘碑傳自義熙年香雲鬱海諸天現
淨雨含花法界懸繡幌千燈同大覺寒林一磬破空禪
我來欲證毗尼義君等須留去住緣

光孝寺黃楊樹子歌

黃楊樹子老僧寺廢院陰森出奇致別幹橫天欲攫雲
孤根冒石空蟠地碧甲細碎攢黃花一年一度抽金芽
陰條陽葉忘甲子滿天但覺風髮髻聞道城南有古柏
合與黃楊爭愛惜淨土慈雲散妙香檀林花雨留深碧
此樹婆娑我倍憐經寒厄閏那知年不爲梁棟從人用

一任支離在佛前

題古柏庵柏樹贈王子駿

開業

柏樹藹森沉怪哉世無匹不知造化心留此笑兀質根
大可蔽牛糝枝百屈佶雁堂高及肩鬱鬱不得出龍蛇
蟠一堆百變鬪強倔如使倚天上竟可撐白日君看慧
業根愛護信古佛不從法界生何處容此物

客窗雨夜

澤國陰連海氣深無端風雨夜沈沈客愁那許詩能遣
鄉味何來酒漫斟念子當歸占鏡卜望兒遠志倚閭心
薄游未是天涯別底使孤吟不自禁

寓劉氏題壁

到來賓主興殊濃藉此蘧廬漫駐蹤人愛席門陳孺子
我慚掃地郭林宗粉餐充膳朝朝市蝦蟹登盤日日供
且向東窗支草榻夜深篝火話從容

重過舊寓時氏贈時大

寒城原上居是我舊游處到今十八年來此必回顧去
佳亦偶爾胡爲眷情慄遷易多新知君子重其故野廬
被短墻竹柏頗幽趣開窗老農話柳下一橋度綠草踐
春泥記得吟詩路往時覺無異及此愴如寤仲舒天人
策長卿子虛賦意謂冠當時且復致奇遇驚風翻退鷁

涸淖困窮鮒幾回經
躑躅竟使錯成鑄
我自老親逝萬事等
烟霧大名嗟不成
一身病已痼衝寒
汰吳榜勉強犯霜露
橐筆隨衆行作惡
三日吐殊非壽陵
子謬學邯鄲步未博
當場笑已遭俗人惡
已矣勿復談余意
本無措主人尙愛我
相見語如絮情親
貌甚野觸我發長句
歸鴉鬧遠堞黯黯日
將暮欲去竚桑榆猶
是當年樹

題海陵程秋橋

紹芳

江樓坐雨圖

時容皖江作

千里登樓客雙眸暫此停
大江流浩蕩急雨間青冥
林色分秋浦烟霏辨敬亭
却從三尺素撥墨聚精靈

舟中雜述

浦樹昏鴉繞舵樓
西風吹雨急寒流行
人欲發重回首
蝦蟹魚鹽望泰州

岸火零星夜轉多
沈家渡口接王河
菱菱小市叢人語
遮莫雞鳴發棹歌

百里周遭澤國中
到來如夢水聲空
客心那復升沈感
獨對檣烏逐便風

茱萸灣北水茫茫
楓葉微紅柳漸黃
一片篷帆三四轉
夕陽猶在半邊牆

海陵喜晤句生卽送別愴賦

久別相逢意未伸
臨歧分袂劇霑巾
昏燈照夜愁如海

濁酒禁寒雨似塵書劍不歸君慣客稻梁無處我嫌人
居行各自難言說只覺文章不救貧

焦季藩先生

徵

示所作北湖雨山少文兩吳君誌

傳時少文將祔耆舊祠屬余以詩奠余與吳數
致音問憾未一見且耳其清德自歐丈蜀江裔
君向之張君丙生皆北湖人也今歐裔並逝張
亦相見不數傷懷感舊統系以詩

北湖兩吳君清風莫與耦讀書遂樂志誓不入城走斯
鄉多賢達俎豆恒不朽我讀焦氏書低首通儒久惜哉
生同時未得執經受後來師歐陽張裔相善友諸君信

佳士說吳不去口有德如仲臺有詩似韋柳忘情棄軒
冕抗跡甘林藪幾回致我書清辭重瓊玖索我寫墓碣
餽我有魚酒此事到而今不止十年後驚風如催輪人
命難久壽歐裔旣徂化兩吳亦終牖頽然延壽翁皤皤
又成叟文筆老愈健清直見深厚因知才德人由來困
猷猷近者我與張亦自各不偶誦讀飽飢寒流落溷塵
垢載尋高士傳低回覺心醜望望艾陵湖清流繞白茆
潛德足千秋人生復何有

余與丙生不以詩相酬答二十餘年矣頃以所作
附便呈閱丙生報一律兼致潤別謂余貧困強

吟能道其潦倒近況不可謂不知言也追往攄
懷率成四十韻以答

慰我吟詩苦多君感舊盟幽憂深世態長大熟人情已
分身無用焉能志勿呈友朋原異轍辭賦本生平憶昔
聯裳會虛懷贈縞迎商歌同激烈延望各屏營氣結堅
金石情親等弟兄低昂隨物論顛倒任心傾歲序馳驅
逝簪裾雜還盈孟嘗殊愛客謂丙生昔所主田丈封五安石最憐甥
謂余舅氏秋潭先生有墅偏能賭無魚便就烹拂花春弄軫掃雪
夜支鎗錦浪三篙暖幽蘭一室清笑言傳絡繹情致眷
洄滌往日風流習於今日日評嗚呼悲宿草已矣入佳

城跡遠心難忘交疎道或更自然同棄置無謂達精誠
未必形神接何勞字句爭共驥千里志各赴有司程積
學身宜富多才衆所驚論傾齊稷下坐徧魯諸生到處
迎蘇季從人羨馬卿飛揚看得勢流落歎無成賤子空
何執窮途莫問行苦心抽乙乙作事橫庚庚不見周原
憲難求薦禰衡承顏奴隸末泛愛羽毛輕翰墨供奔走
錙銖抵器名已知形勢隔重以禍菑嬰苦出三年畢晨
昏百慮并祀無仁者粟養闕小人羹敢復憐身病應難
恃日耕縑緇雖素佩鹽米動搖旌萬物皆凋瘵生涯孰
使令放懷同糞土操術異蚩氓忍笑追疲鼈通神想掣

木犀詩集 卷五
鯨哀鄰猿叫嘯和愧鳥嚶鳴拂札開端綺含毫對短檠
由來傷不偶豈獨管公明

雪夜懷句生松江

憶爾吳淞上扁舟水一涯途窮多作客親老更離家遠
笛風前夢寒燈雪裏花相思汎瑤瑟愁絕雁行斜

有某爲冬巢居士刻遺詞成感題其首

聞笛山陽我正思重披此卷默多時可憐一管春風筆
留得人間絕妙詞

冬巢居與卜生庵

二名皆飲翁
自署所居

老去心情已不堪一種

風流愁絕處冰絲騷屑剩枯蠶

書畫談諧入妙詮當時一見便忘年歲寒記得聯觴詠
此會真如隔世緣

詩酒參園夜半歸比來老宿數應稀十年共聽牙絃奏

只有鍾期意不違

春谷先生凡有詩
篇必示飲翁與余

題紹周齋中葛稚川移家圖

我亦無歸處移家想出塵拂窗披畫本凝睇感真人雞
犬雲中駕妻孥世外身丹砂如可學相與逐牛輪

除夕元日卽事

歲除尙釋無專鼎元日還摹散氏盤自笑心情癡欲絕
獨居宜向古人權

破帽籠頭自寫書
山妻柏酒侍潘輿
却教深巷無車馬
不似神仙俗亦除

匣琴流水避人彈
凍雀巡檐隔戶看
一樹梅花三尺雪
不知何處更高寒

春齋漫成

敝廬苦坐又經年
身世悠悠也信天
啼不關愁歡不笑
此生離恨證枯禪

題小溪上人探梅圖

少小傳衣明鏡臺
早聞初地出塵埃
果然妙證維摩諦
天春風著手來

題紈扇美人折桂

若非秦女乘烟去
疑是姮娥在月中
多少娉婷愁未嫁
桂花香處泣秋風

金陵懷古

龍岡牛首鬱嵯峩
六代興亡瞥眼過
王氣已教乘數盡
風流無奈賦愁多
僧伽法術輕軒冕
帝子文章愛綺羅
落日題詩望鍾阜
青山如畫寫江波

秦淮中秋

長板橋邊自管絃
舉頭明月滿青天
風光人事都如舊
回首中秋十八年

珠箔水簾夾岸開
玉簫金管趁波來
豔歌猶唱江南曲
費盡齊梁六代才

莫愁湖

一湖秋水澹生波
隔岸青山寫翠螺
結綺臨春如比似
風流爭及此湖多

重題莫愁湖

還聞石城樂重到
莫愁湖流水空今
昔佳人定有無
蘭芬銷玉珮波影
隔羅襦六代多金
粉偏傳此姓盧

桃葉渡

桃葉渡頭秋水生
桃根桃葉許多情
行人到此一惆悵

記得風波將汝迎

過隨園

小倉山下路樓館
尙參差花月游人
地笙歌退吏時清
狂容老輩風雅見
新詩剩有門前柳
秋風繞故枝

雞鳴寺

雞鳴今梵刹同泰
舊禪輪寶誌傳遺
跡君王記捨身香
林仍怖鴿碧殿儼
仙人太息臺城事
茫茫幾劫塵

北極閣

傑閣凌雲表崇岡
鎮海隅江山迴北
固城闕壯南都王
氣銷鍾阜金庭換
斗樞天衢如在望
高步愜吾徒

隱仙庵

邱壑在塵市胡爲稱隱仙詎游人外方但結區中緣仰
看巖上雲俯聽林間泉昏晡靄石扉孤霞冠崇巔蕭森
息衆籟曠朗開洞天舊往情旣移今來心未便那聞樛
桂馨但見青蘿懸幽琴尙在壁羽衣殊邈然歸途察榛
莽相望行始前

庵舊有道士王
樸山善鼓琴

舟發金陵

一葉浮空狎浪輕江天淼淼正秋晴風分帆影東西濶
雲隔山光遠近明下筆波濤詩思湧置身舟楫客心平
夕陽蘆荻蕭蕭晚沽酒危磯望冶城

舟泊燕子磯

晚泊依蕭寺斜陽已半峯雲橫隔江樹風度出山鐘流
水空前古扁舟自客蹤勞生隨所遇養拙愧村農

宿新河

水宿淹昏曉空江欲四更暗潮浮舵長殘月射窗明溲
泮秋如許微茫夢不成鄰舟聞解纜欹枕已雞鳴

舟中又作

五夜空江獨賦詩隔舟誰復有人知無端驚起魚龍夢
正是參橫月落時

清歌篷底一燈紅曉色蒼茫變海東三日纔過秣陵驛

來朝還怕石尤風

曉發

鼓棹雞鳴埭乘潮更向東江寒蘆荻水天濶鯉魚風烟
市叢村岸雲帆盡碧空客心連浩蕩吟眺習孤篷

江上吟

一壺載得金陵酒乘醉酣歌對江口天際輕帆萬蝶飛
中流駭浪千山走蘆荻蕭蕭江上寒江南八月壯波瀾
枚生剩有回潮筆其奈關河行路難

游攝山寺

疊巘開龍藏中阿啟雁堂風鳴幽澗響雲覆亂杉涼玉
沼千珠的金仙萬石房俯身看鳥背舉手挾松肪碧殿
喧清唄花龕鬱戒香三乘觀象教千劫悟空王躡屩尋
危磴聽鐘送夕陽招提巖岫遍梵蹟說蕭梁

登最高峯

諸山壓江甸茲山最峩前羅衆峯秀背負蒼天高竅
兀青芙蓉屹立干雲霄昨日江上行芥舟在堂坳仰觀
雲鶴翔今始登其巢海色涵空蒼江流亘長綃諸天無
一物四面秋雲飄是時八月中清商鬱蕭騷風泉雜林
木足底崩奔濤骨冷魂亦清忘身出塵囂何時絕羈勒
誦經棲僧寮

題最高峯壁

江山終古亘無邊
秋滿晴空一笠圓
鳥道千盤行不覺
欲攜詩句問青天

放船赴京口

曉色開京口
朝光炫海門
波聲迎地籟
帆影入天根
舊邑吳墟杳
叢祠漢祀尊
薄游方匝月
水宿幾晨昏

爲竹坪上人題故太守墨卿伊公山水冊子

寸楮精靈聚
江山萬里天
風流思故守
書畫證枯禪
墨瀋香林潤
雲光法界連
千秋傳梵篋
能事想毫顛
爲六舟上人題紀伯紫先生遺像

省識風襟感不勝
畫圖流轉屬山僧
夕陽秋草臺城路
記得吟詩最上層

題汪小峯秋篷傍雪圖

未許扁舟去
君今正少年
遠尋江上樂
祇向畫中叢
荻秋將雪清
波晚欲烟風
流陶峴迹
更待寫三船

嵇庵詩集卷五終

稽庵詩集卷六

自題野哭集

并序

江都 梅植之 蘊生

嗟乎冰寒日薄迫窮節而驚心事去人亡託哀
音以代泣潘安仁之永逝祗述同衾庾子山之
傷心僅言繼體虛室空牀之歎龍摧珠碎之悲
猶復含涕裁詩傷懷染翰諒古人之明達亦有
所不得已焉僕四十無聞三靈有譴生人道盡
天意何辜易骨月而戈矛毀室家於水火臯魚
擁劍頓興風木之悲莊周鼓盆又作形生之論

有弟則四方餬口無家則三歎歸來春露秋霜
奠寢門於何處晨炊夜績哀中饋之無人倥傯
年華倉皇性命灰釘甫畢訟獄頻仍加以罵勝
侯生病同沈約鬼伯瞰其出入流俗肆其揶揄
那能慘怛之呼自覺肝腸之斷曰爲改歲僅弔
孤生譬之痛絕而甦更深於就死醉醒而哭倍
慘於沈寔擁王章獨泣之衣負子路無親之米
鰥魚不瞑况聞涸轍之呼窮鳥何歸更破傷弓
之膽天乎無罪生也何爲然而春蠶旣死猶抽
未盡之絲杜宇無聲空賸哀餘之血旣長言之
不足非所望於知音恐余壽之弗將更遺罹於
生我聊奏祥琴之曲獨呻虞殯之歌凡此三年
都爲一集語無倫次多述哀傷

驀然一覺那邊尋如此因緣也不任天道難知元有恨
我身猶在豈無心千層碧海鮫潛泣萬壑秋風狄獨吟
俯仰蕭寥空隻影夢魂顛倒度虛陰

乙未清明乞碧溪上人同往施家冲之原爲先慈
合葬兼卜亡妻新阡路經蜀岡智光上人飯於
平山堂傷而成詩

一百五日清明節四十二年貧病身不堪荏苒開芳序

忍復淒涼對此辰
晒藥何時重有婦
倚閭今日更無親
死生一髮千鈞重
哭向東風淚染塵

銜哀展墓卜新阡
追逐維摩結勝緣
合葬幾時封馬鬣
兆祥何處得牛眠
冬青一樹春無色
宿草三年血化烟

先君於辛卯歲安葬

落日悲風號欲絕
與師歸去說空禪

越陌連阡赴蜀岡
惠休有約待山堂
當前齋食諸僧會
到眼鶯花獨我傷
未了百年慚子鞠
欲除千劫禮空王
上方鐘磬香林動
催轉禪輪晚路長

平山堂木蘭花歌賦呈碧溪智光兩上人

瑤臺二月春飛雪
吹落香雲寒不結
何處東風一樹花

珠排玉綴當階列
直幹干霄鶴鶴游
低枝攬地蛟龍掣
此樹平山種者誰
聞自歐陽信堪說
八百年來歲月深
豫游幾度翠華臨
護持佛助生成力
長養天垂雨露
心婀娜參差復驚矯
曾經天步花間繞
香霧濃熏
袞袖龍瑤柯上宿
迦陵鳥偉哉拔地
凌珠宮烟霞日月
風雲通靈根百丈
注泉脈不數日觀
東蒙松我來碧殿
披香坐賦得新詩
獻遠公

復爲亡妻卜兆

當前死別已天涯
從此飄零那復家
爲汝歸骸先壠側
幾回看到石楠花

先慈葬後無家卽借弟

樹之

寓居雨窗泣賦

與爾來此居不死腸已斷死者旋赴壟生者又離散蒼
天究何命幻此不測難今宵兩相視無語淚流漫銜哀
且慰爾嗚咽雜長歎勉強促爾眠獨自泣夜半

荒雞叫短墻寒燈隱孤屋燈昏天漸明苦雨淋叢竹草
榻濕不眠達旦水浸足同居皆異客獨興恐怒觸撫枕
驚何人嗚嗚夢中哭下牀推爾覺不是在家宿

悽涼弔同生念我僅妹弟妹已前有家顧爾獨流涕勿
以此流落生死千鈞比吾親有厚德門戶豈絕祀勉旃
各努力盡已俟天理艱哉復艱哉人生有如此

酬訥庵上人畫嵇庵圖

上人知我無家客爲我作圖先歎息竹木軒窗在眼前
明明寫出傷心色東壁有牆高及肩藥欄花榭相連延
空堂如聞鬼夜哭滿紙拉颯秋風絃何處兒嬉何處讀
夢中來往都能熟老親病婦魂不歸覆巢破卵天何酷
太息吾生信有涯於今何地更爲家便從紙上幻泡影
側身凝望疑非耶寒燈照夢雞啼樹愁病迷離此中去
愧爾風前南雁翔茫茫四海天無路

題楚楨聯句詩扇

并序

楚楨有會必以詩文記事謂歲月不居如波流

電逝我輩所得者亦勵此余當時笑其迂不之
覺也此會距今甫六年時地都非友朋各散求
如曩之點筆擘箋狂呼角藝了不可得右軍所
謂情隨事遷感慨係之者古今一致也乙未七
月楚楨過揚借孟瞻省試出此箴屬題記重賦
四詩載今日事不知楚楨他日見之更復何如
載酒聯吟感舊游幾人離索不勝愁含毫又觸新詩句
更與他年爪跡留

愁病無家久廢詩比來不似對君時從今念我知何處
檢取吟箋慰所思

昨夜秋湖泛月明野雲烟樹半陰晴一年會此僧齋閣
無那忽忽赴石城

敞放接襪共扁舟籍甚東南數一劉看取扶搖搏勁翮
雁行真是九天遊

漫興

爲雞或爲彈遭值皆偶然世事萬顛倒動云數與天請
觀大塊中更溯太古先了了無一物胡爲苦拘纏所以
賢達人飲酒終日眠

送楚楨歸寶應

道邇魂亦勞想君屢朝暮歲環聊接懽情促不成遇昔

來蓮欲紅今歸雁方度世事一轉轂物態各紛霧前月
波上舟沿洄柳邊住共食齋房芝觴榼那能具豈云敞
高譙且得慰深痼昨日復言邁整駕發霜曙衆人何去
留吾道自調護寥落夢遠舳惆悵寒湖路

虹橋步隄稍次小金山看芙蓉同泰州程文伯

紹

昌田生季華

普實

沿流散襟帶緩緩沙邊路石瀨浸寒藻湖霜半黃樹幽
探興不淺遠引臨前隄芙蓉照水影上下花與齊隔湖
望山寺背嶺聞清鐘孤雲出深翠澄氣歸蕭空遙睇候
雁翔近惜芳華歇葭茨蔽汀渚漾舟前泛月勝游詎同

異各自爲秋春相與坐磐石試看湖上人

蓄書數千卷無家可藏假置館齋蟲復囓其半憤
而成詩

蠕蠕若沙塵爾亦偏讐我身外蕩然盡何須計么麼書
卷性所愛樂此致奇禍無家不遑問飄泊隨右左哀傷
與飢寒對之百城坐乞假好房櫳安置頗貼安奈何遭
爾菑蠶食當果蕪從來文字劫所在測誠叵早知此銷
亡不如付諸火讀書被天譴死我無不可呼童強收拾
一笑捐瑣瑣

館齋雜詠

一樹黃梅始著花天寒故故影橫斜客窗饒有閒風味
何必嵇庵乃是家

飄零書劍泣途窮何事鄉園作寓公南北東西顛倒看
此身無處不虛空

離家豈復同王粲匿跡何嘗類趙岐天意蒼茫人事幻
不堪重詠春令詩

故人勸我且休吟謂是淒涼感客心從此對人無隻字
獨將孤調寫枯琴

孟瞻以余詩比汪容甫先生文哀切不能卒讀至勸余廢詩以延年

羅含已入湘中去楓葉猿聲路幾千夜夜弦弧望箕斗

爲憐脫帽想談天

羅茗香精於大官之學過齋中談麻露頂劇言終宵不倦今游漢上

劉氏文章少抗衡楚楨淹博孟瞻精天池已見真龍躍

玉瑄將調紫鳳聲

楚楨今歲報捷

親故年來縞紵休慚無樽酒結綢繆平生念我關生死

祇有山陰王子猷

今歲無家親知落漢惟王君瓚華日相過從

傳經此日慚孫寶擁篲他年學孔嵩文行不成春不賃

伯通何事食梁鴻

余館紹周家

一回見汝一含悽話到哀傷首自低鴻雁天涯猶接翼

可憐流落各東西

舍弟樹之近亦旅食

書卷縱橫夜四更由來積習若平生舉頭一觸身何處

正是雞啼第二聲

東李丈于陽

桐

奕葉龍門品望儲夙承青睞感何如詩篇本挾仙人筆
卜筮兼通太史書記得高軒經委巷那知窮鳥失吾廬
故園旅客書空笑聊述商歌遣歲除

哭母

母氏懿德我何敢稱謹述其戚黨所共見聞者
流涕書之使有道仁人知吾母之所遭與不孝
之負罪其白於天下後世焉

吾父幼也孤五歲養於舅無子續其宗異姓權爲後三
十生長兄門戶有荷負及母孕我時母已禱神久生兒
必歸宗改姓自母曰吾父聞此言呼號生父母豈知我
姓名出自吾母手此事在我家母功可不朽生兒已四
十讀書更何有母生兒長貧母死兒喪婦悽悽兒一身
禍又起臂肘倉皇引兩棺負主無門走且復假僧齋時
祀難久守嗚呼天何辜痛絕心如剖
吾母有厚德兒述安敢私豈云頌賢智渾渾皆深慈鞠
育非所生百事踰其兒戚里歎未見母何有意爲忘身
乳豺狼竟罹梟鳥危仰視倉浪天理命何所施我身亦
人子銜冤將告誰不如從黃泉何苦爲烝黎

長至

今年長至都無事更覺傷心勝去年慈母音容難在寢
病妻呻楚絕同眠招魂無處陳杯酒野哭何方化紙錢
禍到滅家天不悔蒼蒼於我竟何緣

悼許孺人

歲之周兮怛余病以悠悠諒爾形之已化曾不爲汝兮
綢繆眷綢繆兮何極竊不敢忘汝之德昔有親兮在堂
賴汝力兮扶將汝于歸兮荏弱能孝愛之成章我有妹
兮未笄教婉婉兮汝爲師羌言容之維則勉無愆乎令
儀我家有汝兮多故汝暉暉兮調護惟一親兮弗知汝劬
勞以成痼何一紀之未終余室家之遭凶哀親喪兮相

續更苗及於爾躬悼爾躬兮綿薄奉威姑兮以藥詎相
侍以從泉涕無聲而迸落余有譴兮在天旣延汝以天
年慘衰髮以歛汝猶顧我而眊眊魂一逝兮旣息我毀
家兮患難測目遺挂兮無方汝歸魂兮不得慟汝魂兮
不歸有先隴兮汝之依卜靈辰以告窆汝安知夫余之
所悲

雁孤飛詞

紹周鸞雁而詞之五日飛去爲作此詞

雁孤飛孤飛何所歸不管天涯儔侶稀昨來已折雲中
翼瑟縮低垂飛不得兄弟關山苦斷行稻梁雞鶩羞爭
食雁孤飛孤飛聊自呼此心不得忘江湖此時何處棲

菰蘆雁孤飛孤飛亦何苦
剩有風前斷毛羽飄零猶復
身無主一飛一鳴可奈何
使我心傷淚如雨

立春郊行

春至何關我驚心首重回
百年原夢幻萬事一塵埃
宿雪寒穿樹新波暖化苔
此身殊未了望盡且歸來

除夜

有淚無方哭悽涼又此辰
死生俱不合理命究何因
那復尋家室甯勞問鬼神
百年身七尺一髮引千鈞

寒夜觀香祖筆記偶擬論詩豔稱之句題一絕

客中愁病寂於禪孤館寒
燈夢縹緲何處有聲尋
不得

窗風吹雪灑琴絃

詩人微妙在聲情隻句單
辭每眷紫暮雨瀟瀟傳一曲
吳孃風調最知名

聽鐘聲

鐘聲出寺中有寺在城外
我但聽鐘聲那知寺所在
鐘鳴出以杵聲來送以風
風聲不可辨只有風中鐘
一切虛空中聲妙最難領
我與打鐘僧何人得深省

題慎伯先生述書

開源上蔡與陳留體勢風
情各不侔解識毫端龍虎
氣斷碑須向北人求

從來分派有鍾梁昭穆孫曾若雁行不意歐虞新締構
千秋數典竟相忘

語入精深妙悟開十分功力見真才書裙削板空何益
親向安吳問訣來

齋中卽興

凍禽三五啄梅花晝掩西扉日易斜自覺心情塵不到

楞嚴讀罷又南華

送楚楨赴禮部試

鏘金錯廉纓崑璞耀華英蘊靈道儲寶汁機天流精凌
驥邁彥哲鬱蔚懋儒衡觀滄麗明輝游霄暢和聲軒絃

協陽瑄蜚轡馳

神京射策衷舒誼振藻排淵卿陟聞

際誅蕩望雲豫嚶鳴緣湖鶯蘭楫肆延挹瑤觥鸞遷曙
林暖魚上新波清勉旃龔璠璵贈子平生情

丙申元宵

亡妻故日

一年悽絕又今宵從此人天總寂寥何處招魂聞鼓瑟
可憐無語憶吹簫愁深碧海波千疊夢斷春風柳萬條
月影分明花影散茫茫離恨滿空霄

孟開過揚赴禮部試卽席書扇

落梅風滿綠楊城忽漫逢君又送行應念故人淮海上
一時翹首望春明

題唐故淮南節度討擊副使田侁墓誌石

道光丙申二月吉茱黃灣前獲唐石刻剔苔沙露文字
 乃知下有田公宅去年河夫聞治隄傍岸穿沙得深窟
 方平蓋覆四石聯委置荆榛雜礪礪題以淮南故節度
 泗州長史開國伯兩篇刻字幸完好書人撰者桑儲筆
右衛率府騎曹參軍桑叔文撰 累勲著績不一書想見
右金吾兵曹參軍儲彥琛書
 戎功甚輝赫生榮沒已本常理不有斯文誰愛惜距今
 上溯唐貞元千一百年等朝夕嗚呼發我思古情捫石
 披文長太息伊昔李唐制節度大都督府王領職佐以
 長史副大使司馬倉兵萬人力當年設官得統馭誰云

強弱致顛踣自從天寶百度隳范陽變起西京失咎謂

兵權出重鎮安史披猖亂難遏豈知失守自畿輔疆牧

何嘗不匡弼此地淮南控楚吳權衡設道分南北建治

揚州領十二才非幹濟難修飭考自唐德貞元間守官

杜亞當斯日陳君少游既羞死公備戎行從討擊殊禮

延公入幕時誌云故淮南節度使工部尚書上逮興元

從大歷舒卷風雲定淮海誌云云二李憑陵氣先奪通鑑

歷十一年陳少游從討李靈曜於汴州建中二年遣兵

擊海州李納巡官王涉四年從討李希烈屯盱眙以誌

考之田君 皆與其事 丈夫功成名既遂信公卓犖真人傑高才雄
 畧武且文比以關張亦宏濶亦誌奈何五十正服官鐵

馬金戈去無迹淮西兵阻葬臨灣山寺南原卜窀穸其人誌云道路艱阻未獲還鄉權人代茫茫千百春封樹

卜葬於江陽縣山光寺之南原無存誰得識史既闕文志莫載不憑貞石從何質乃知

遺逸世孔多簡冊流傳萬之一崔圓杜佑碑久磨王播

淳于塚俱沒考古徒從故帙稽何如此刻堪徵實頃見

會昌米氏誌斷泐今為沈君獲石方尺今藏沈君與九家短章堪匹

萬夫人此石汪孟慈員外載至京邸似兩參軍恐非敵翩翩詞翰照

千秋或者精光斗牛射若教早出三十年合載唐文貯

天闕如此至寶天賦我哀我孤窮好古癖今年既得

天寶鏡胡為更遇非常物金石文章富且壽都忘貧病

無家室單車輦載寄書齋摩抄已瘵幽憂疾嗟無尺宅

與寸田不似懷藏匹夫璧人間所寶豈貴此權作儒生

萬金鑑幾回撫翫復長歎後之愛者真難必陳辭來歲

奠椒漿封土河湑為標碣遺與他年續志人未知載筆

誰編入感賦斯篇曠代心髣髴天濤降靈魄

詠天寶鏡

金樸耀深華塵沙莫能變綈襲蒙澄輝炯若月一片背

鑄天寶年苔澀篆如線不知誰巧麗遺傳世萬徧豈無

絕代姿窺春出花殿恍惚千蛾眉幽窗夜深見我且寶

真鑑聊復纂綃練

三

卷六

三

三

聞歌

一曲清歌自繞梁不關琴瑟間笙簧韓娥老去秦青死
借問何人解斷腸

謁來

謁來情思更模糊花月樓臺夢有無滅燭我偏聞子夜
採桑人自見羅敷游絲風斷吹千尺春水波平綠一湖
愁絕天涯何處是萬行楊柳接蘼蕪

拜秋潭舅氏墓

到此羊曇淚深情想涓陽綺羅千酒瓊湖海一詩囊墓
雨荒花碧塍風麥穗長空餘隋苑土寂寞葬韓康

率賦近事書訥庵上人扇

慧業由來自少年已將書畫代談禪幾回作我新圖好
那不烟雲到巨然

華嚴讀罷奏絲桐誰與尋師訪問公一架銀藤香雪散

連朝吹到落花風

時問樵
游天台

送黃聖臺

春熙

游金陵

我昔金陵十度秋一回一度中心愁青山滿眼不稱意
江天廓落空扁舟前年又逐秋風游游子歸來銜百憂
到今追悔去何苦孤兒淚逐江波流嗚呼萬事皆已休
側身天地同沙鷗山林笑我不早到我亦何戀何拘留

聞君告我江南去觸著當年舊游路孫楚樓頭對酒時
孝侯臺畔吟詩處眼底茫茫迹已陳一時登眺更何人
浮雲滿天撒蠛蠓那須佛說蕭梁塵君今挂帆遍尋歷
放懷飽看江山色好與明年作浪游避人早蠟登山屐
芍藥花開四月風送君書劍逐烏篷無家薄餞河橋酒
醉把將離淚眼紅

重送聖臺

去年聞賦泮忽漫遠依人文字飢寒好交游閱歷真牽
思將岸柳浮夢逐波蘋莫厭秦淮水頻書付赤鱗

季華歸自江上索詩

前日爾從江上來告我諸山迤邐雲屏開洪濤東流下
海水西望峩岷九千里歸來載得詩一囊江光山色皆
收藏連朝就我不肯出蛟龍雲氣蟠書堂爾生合著尋
邱壑櫻拂行滕兩芒屨或把丹經道士游不然閒與仙
人博何時與爾凌三山呼龍高出雲霄間太清日月蓬
萊閣下視江天亦等閑

題瑤華道人山水畫幅

石菴劉文清公以奚不登山誦我書鬱鬱窈窕真人

虛句意索圖道人以二句爲七絕首句識圖首

奚不登山誦我書鬱鬱窈窕真人墟生平夢想苦不到
快哉異境開斯須丹臺千盤切雲漢飛身直入三天都

碧殿朱宮半隱見松門石路交縈紆陰崖合杳杳深翠
岩巖更矗雲峯孤天台瀑布垂空虛蒼梧雲氣東南鋪
長松如茵伏龍窟下聞萬谷轟雷車中有一人冰雪膚
手持竹杖披蘿裾徘徊飛梁望巔頂洪崖笑向雲中呼
驂鸞駕鶴了不用天門四闕羣仙趨坐觀終日神欲化
驀然一覺生長吁人間何從覓此境得無員嶠方壺圖
我今身世心已枯孑然江海之孤鳧披髮入山受真籙
問誰佩我靈飛符流連此卷三歎息詩情畫筆心交輸
一代賢王合名相神仙富貴天人俱吁嗟凡夫苦濁惡
精靈那得游華胥

奉酬姚司馬石甫先生瑩枉題拙集元韻

文章人誦千秋業政績民傳五袴辭三日往來江上路
扁舟猶爲我題詩

附原作

丙申二月自焦山回舟中讀嵇庵詩題二十八字
頻年吟苦不成句寂寞湘妃楚客辭今日金焦放船
去一帆風好讀君詩

題楚楨江淮泛宅圖

劉侯學行真師式泛舟遠就江淮食妻子圖書載一船
半生漂泊頭將白去年射策登賢書今年落第辭燕都

倥偬情懷付圖畫爲君睠望空唏吁讀書第一人生好
無救飢寒博溫飽佳劉經術馬班文請看諸公亦潦倒
烟水茫茫春復秋江關詞賦卷中留側身更有無家客
我似風萍海上鷗

古意

東海有鳥名冤禽銜石塞海愁海深斑竹何情自有淚
卷菴雖生亦無心林深月黑分明語猿狖何悲雁何苦
終古空山不見人滿天颯颯風吹雨

擔土塞井井亦枯煎湯沃水冰盡蘇藕絲牽連出藕孔
妾心挂在君轆轤羅幃夢醒驚啼鳥鏡裏芙蓉幾時好

勸君休摘合歡花一摘空成斷腸草

秋夜聞蟲懷楚楨

有聲偏不絕涼滿夜庭空暗遣墻頭月低吟草下風夢
沈千里外愁併一秋中念子如流軫相思永夕同

自題嵇庵詩集

蠶眠蠅集儘分明哀樂無端逐境更那得盡償來者願
可憐多謝古人情淚痕血點燈前影夜鶴秋猿夢裏聲
太息飄零頭浸白更從何處說吾生

東聖臺

烟雨臺城入望遙野亭疎柳白門橋夢魂流下江波去

又是秦淮正頂湖

載筆辭家那稱游浮雲落日悵悠悠近來不似嵇生懶
愁寄相思到石頭
客中魚素幾番多憶我飄零可奈何一病心情都似水
秋來不願再生波

秋望

寒蕪立盡夕陽遲拂面輕颺亂鬢絲遶樹已經花落去
仰天仍是雁來時波光雲影詩先覺月白風清病獨知
擬向高樓橫玉笛夜深幽怨漫低吹

黃生菊人

華

詢予近作賦答

亦知情已盡爭奈我猶吟碧海深深淚青天寸寸心有
誰人耐聽相望爾知音翹首蒼茫外低昂直到今

送問公往高明寺

交親託方外生事已可知憔悴得禪伯慧妙真吾師寂
寞離恨界窈窕天人姿終執貝羅葉一了三世疑

敬和春谷先生爲作詩序賦貽之作

已分幽憂漫獨吟敢親墻仞託知音自來燕市難爲價
一望龍門轉廢深花月流連人似昔琴書飄泊我如今
斯篇足抵三都序竟許千秋恐未任

附原作

爲蘊生作詩序畢感賦貽之

忽漫交君十五年回頭逐步憶前緣坐中客換知多
少席上燈消到幾千怪底琴尊元似舊爲誰花鳥不
如前他時汝更思今日白髮清秋著此篇

賦謝王君瓚華爲刊詩集

箋楮飄零任蠹塵何緣傳播賴君珍笑啼如我翻無事
文字關心問幾人風雨山川情一室樓臺花鳥夢千春
從今雪迹餘鴻爪料理偏勞在此辰

岑生仲陶

銘

爲余校刻詩集慨賦與之

潦倒情懷剩有詩由來性僻幼難移低昂兒輩頻驚座

歌詠親幃憶解頤到此窮愁悲作客那堪荒落愧爲師
他年領取風騷旨記得今宵校字時

九月八日雨夜

誰與悽迷習夜闌夢中有夢太漫漫雨穿落木飄燈濕
風疊疎鐘度枕寒秋去當悲非我意菊開如好自人看
來朝見說重陽節便負佳辰也覺難

九日與瓚華游小金山遂至平山堂

新晴快人意與君九日游相約共登高不如波上舟演
漾傍沙岸紆徐趁寒流雲垂樹倒影澈底湖中秋隔水
望芙蓉窈窕如可求且復緩蘭楫欲去情自留

日午湖上堂逍遙玩來久除却兩人在雞犬亦何有前
日出水蓮零落沈渡口舉手弄寒條風流尙楊柳乘情
恣幽興步出山前後不見白衣來遺我茱萸酒
買醉出茅店泊舟登平山昔陟情旣眷今來心更閒仰
視岡巔樓高出秋雲間空明極萬里遠絕難躋攀颯若
行長風御我捫天關相與入寥一安事歸途還

奉輓李都轉蘭卿先生

彦章

正指輶車轉翻驚總帳懸風騷扶大雅尊俎續前賢屢
下周徐榻虛同李郭船賦詩傷正遠不見使君傳

憶弟

相見悽然憶惘然朔風吹雁歲寒天比來更覺難忘汝
知否飄零又一年

遣興

俯仰真無著哀吟遠望賒霜情餘砌菊寒色入風鴉昵
我惟書卷拋人此歲華不須詹尹卜吾自有生涯

憶寶山毛生甫

嶽生

說詩誰最善我愛大毛公道以文章重交緣意氣同江
湖歸白髮歌哭在秋風

時生甫
居憂

歲晚思蓬華句吳更向

東

采蘭

并序

夫思積而動人心所不能免也憺怛之呼亦聞者所共深悲也故民性斯在發止焉踰政教之通聲情既遠必舉芙蓉於木末種孤竹於山阿何以興乎亦云固矣僕聊抒幽憂之疾率爲案衍之音豈謂窮而後工本乎家學而求之弗得聽者伊誰

誰與牽蘿賦采蘭雲山百曲路漫漫美人過處花爭發
明月圓時漏未殘南浦送君臨水望碧天聞雁倚雲寒
年來乞取餐霞術擬向青鸞託羽翰

拂霧披香幾次過碧房粉戶柳婆娑秋宵蝴蝶深深夢

春路蘼蕪曲曲歌山擁畫屏雲駐影江流澄練水生波
誰家窈窕當風立自掃花陰薦綺羅

幾聲烟外鷓鴣啼風拂金塘月滿隄繡帳卷衣秦氏女
綺窗織錦竇家妻梨花自冷楊花暖桐葉偏疎柳葉齊
昨日嬾姍林下過無言桃李竟成蹊

揭來芳思繚烟汀秋碧春紅望杳冥漫整雕鞍還策馬
自拋紈扇屢飛螢尊前竹葉休辭醉笛裏梅花試再聽
愁絕楊枝攀不得別來猶是舊時青

十二月除先妣喪而婦服已踰適詩集刻成燈下

展視愴賦

匣琴哀絕那能彈腸斷三年淚不乾終古松楸成想像
一編歌哭此艱難燈銷客館雞先警月落霜城雁正寒
昵影低昂空自弔拂塵顛倒幾回看

寒宵掩卷廢蒿莪瓠落孤生喚奈何鍊石那聞天不漏
望洋幾見水迴波虛延嗣續恩何補欲報文章疾亦多
夢醒啼痕烏夜噪我猶慚汝戀庭柯

蘆簾紙閣想依稀太息東南孔雀飛生已糟糠諳婦職
死猶髮總戀親幃支離累汝先嘗藥憔悴看吾屢下機
門戶不存遺挂盡可憐空賸泣時衣

奔駒難許駐年華歷亂心情願亦差黃霸傳經真忘死
馮驩彈鋏已無家悽音漫理風前瑟生事都憑夢裏花
誰與浣薇誰覆瓿載將此恨滿天涯

稽庵詩集卷六終

稽庵詩集

卷六

三

維揚灣子大街龍
文齋穆子湘董刊



